



海國圖志
國地總論
釋五大洲
釋昆侖

ル 2
2965



凡 2
2965

凡 2
2965

海國圖志

清魏源撰

國地總論

池上學室藏梓

大正五年三月十日寄
奈良生順氏贈

叙

西人地球說一出。人皆以古典所言為荒誕。若然則智有餘于今。而不足于古耶。創教垂萬世者。匪古聖賢乎。而不能及焉者。匪後人乎。聖賢而智不足。不能及焉者。而智有餘。豈有斯理哉。清魏源著國地總論。觀其所釋。古典言四州。歷歷可證。西人未沁究。而至圖山川。則亦大謬焉。夫魏源匪釋徒也。不敢私護梵典。又匪不通海外事情者也。不敢偏拒西人說。然而其所辨如斯。其不亦公乎。由此觀之。古人智固大。匪若後人區區自鑿可

知矣。抑古典載道者也。若夫地體說。固其餘及。今以之為荒誕。不足以病古典。雖然一唱萬和。其勢將至。并道斥之。苟斥道。則殘忍貪婪。不至人相食不止。是余所以不得不憂也。

明治二年歲次己巳十一月至日。鶴嶺道人叙於池上南谷學室。



海國圖志卷四十六

國地總論

原無今補

邵陽魏源撰

釋五大洲

梵典分大地為四大洲。西洋圖說得其二焉。而強割為五。為四考。萬歷中利馬竇所繪萬國地圖。及南懷仁之坤輿圖說。與天啓中艾儒略之職方外紀圖。皆以地為圓體。故分前後二圖。其一南抵五印度海。北至鄂羅斯冰海。東盡日本朝鮮。西兼葱嶺以西。是為中國。阿細亞洲。一作亞細亞。一作阿西阿。其西北之歐羅巴洲。西南之

利未亞洲則皆以地中海為界。地中海以北為歐羅巴洲。南抵地中海北負冰海廣萬有千二百五十里長二萬三千里地中海以南為利未亞洲。北起地中海南至大浪山海廣十度東西長七十八度兩洲之西皆盡西洋大海兩洲之東則皆與阿細亞洲相連。利未亞之東則以西紅海與阿細亞洲為界。歐羅巴洲之東則以阿被河及北高海與阿細亞洲為界。此第一圖也。又有南墨利加洲。北墨利加洲。墨利加今譯為米利堅二洲一峽相連。中分南北。其地東南相距百有八十度。南洲南北四十二度。北洲如之。此第二圖也。圖中諸國風俗物產疆域氣候。

瓜區豆剖。指掌畫沙。質諸閩粵互市之番舶。重譯獻琛之貢使。事多徵實。語非鑿空。似可以盡富媪之形勢。窮四洲之方位。然以說徵圖實止二洲。無所謂四五也。說文水中可居曰州。其誼蓋起於洪水以前。及降邱宅土以後。因而不改。後世偏旁加水為洲。故鄒衍談天則裨海所環曰神州。釋典論地則鹹海所畫為四洲。是洲者四面皆水之名。未可以陸地所通區為渚嶼之國。今歐羅巴利未亞之山皆發脈葱嶺。邈迤而盡於西海。是即以葱嶺東西畫為二洲。尚不可。况於葱嶺迤西之地。強

指一河一泊為界。而職方外紀之阿細亞與歐羅巴二圖。一則界以太乃河。一則界以阿被河。此二河者。一在裏海之西。一在葱嶺之東。相去二十餘度。計五千餘里。循前圖。大乃河則西侵歐羅巴之界。依後圖。阿被河則東侵阿細亞之界。究竟此二河中五千餘里之地。屬彼洲乎。屬此洲乎。譬之剖中原為南北。圖南朝者。則以黃河為界。圖北朝者。則以江淮為界。畢竟此江北河南數千里。屬南乎。屬北乎。地中海本非西海。特以亘二域之中。衰將萬里。濶二三千。里。與西海相灌輸。即後漢書大

秦條支二國所隔之西海是。古書所言西海。皆即地中海。今既知有大西海環其外。而反指地中海南北為二洲。不蹈漢人故轍乎。至墨利加四面環海地數萬里。洵別為一大洲。惟不得以其中央地狹。而判之為二。與前圖同弊。西人既尋得墨利加之後。復念地為圓體。更西應亦可至東。因更航海。西尋數年。復得南極下墨瓦蠟之地。因并南北墨利加為一洲。而以新得之地為第五洲。然未嘗測其南極高距之度數。江河入海之津口。衣冠人物之形狀。以告天下。後世第言平原滄蕩。螢火星

流則尚未晤一人。雖至其地與未至等。故佛經所謂四大洲者。西人止得其二。而餘未之聞焉。或曰此二洲者。於釋典四洲當為何洲。曰阿細亞。歐羅巴。利未亞。共為南瞻部洲也。南北墨利加。則為西牛貨洲也。梵典言瞻部洲中有四主。東人主。即震旦。南象主。即印度。北馬主。即蒙古。哈薩克。西寶主。即大小西洋。是歐羅巴。利未亞。皆屬瞻部洲之明證。至北具盧洲。則隔于北冰海。故海船無遶北海而歸之事。東神勝洲。則阻于南冰海。故西船雖能至南極。左右視其地而不能遇其人。南懷仁坤

輿圖說。顧闡釋典四洲之誼。謂南洲當在赤道溫帶以下。不當以瞻部為南洲。是蓋泥南極北極為南北。不知釋氏以北極南極分上下。而以前後左右為四方。同于儒家六合之誼。其謂天頂為北者。乃中土人一方斜睨之見。其實天頂辰極豈偏于北。又安得以南極為南乎。釋典又名四洲。曰南閻浮提。西瞿耶尼州。東弗婆提州。北鬱單越州。故起世經言南閻浮提日正中。時東弗婆提日則始沒。西瞿耶尼。日則初出。北鬱單越。正當夜半。易地亦然。又閻浮提洲。所謂西方瞿耶尼州。以為東方。瞿耶尼州。所謂西方鬱

單越州以爲東方。鬱單越州所謂西方。弗婆提州以爲東方。弗婆提州所謂西方。閻浮提州以爲東方。南北亦然。樓炭經云。日繞須彌山。東方日出。南方夜半。西方日入。北方日中。如是右旋。更爲晝夜。釋典四大洲之誼如是。釋典四方之誼如是。請以告西洋之分。二大洲爲四。爲五者。并以告西洋之泥。南北二極爲南北者。問釋典言佛降生必于大地之中。故印度據南洋小西洋之間。釋氏皆以印度爲中國。他方爲邊地。西印度爲天主所生之。如德亞及回教主所生之。天方國皆居阿

細亞州之西。利未亞州之東。夾南海地中海之際。故天主教則以如德亞爲中國。而回教以天方國爲中國。其尊西印度。如佛教尊中印度等。是二洲適中之地。自古異人所挺生。然謂居二洲東西之中可也。其地皆偏瀕南海。烏得爲全洲之中。曰釋典不言居瞻部之中。而言居大地之中。則是據南北二極言之。二極之中爲赤道。近二極皆爲冷帶。稍離極爲溫帶。正當赤道下爲熱帶。南洋各國。正當赤道下。距南北極度數皆均等。其地終年恒煥。是則正當地球南北之中。又正當瞻部洲東西

之中故彼自命為中國也。使專據瞻部洲言之則正中莫如葱嶺而環葱嶺左右古今但為游牧部落不聞產一英傑何耶。故曰東海有聖人出焉西海有聖人出焉聖人之出必在海濱扶輿旁薄之氣必至平原近海如雍冀青兗而後剛毅始盡冲和始鍾惟是印度正當熱帶地過炎煥人多裸袒而震旦則正當溫帶四序和平故自古以震旦為中國謂其天時之適中非謂其地形之正中也。西洋溫帶之地則為地中海所占而歐羅巴亦偏于冷帶利未亞亦偏于熱帶故儒佛回教天主教

皆生阿細亞洲天文算法奇器亦皆創自阿細亞而後流被於歐羅巴洲至利未亞洲之腹地周萬餘里萬山環之不與他國往來故雖以麥西國亞毘心域國之聲名文物亦不通中國而西洋市舶所至則僅其邊隅黑奴烏鬼之區而已是則又以瀕海為糟粕腹內為精英地不靈者人不傑信哉。小西洋利未亞洲瀕海之地多產黑人歐羅巴商舟過之多買為奴供役使明史謂之烏鬼今沿其稱呼西洋為鬼子然白夷與黑夷各產各地相去數萬里豈惟非一國并非一洲今謂黑奴為烏鬼可也至南北墨利加洲地廣數萬里與瞻部洲同其大明代始與瞻部相通而自明

以前其洲中數千載。不過草木蕃殖。游牧射獵。竟無創教治世之聖人。及各國開墾通商。始知有天方天主等教。釋典言佛出世。必在浮提州。其三州皆無佛。乃竟並天主天方之教。而無之。則瞻部洲為四洲之冠。何疑焉。歐羅巴利未亞。皆奉天主天方之教。而天主天方并產西印度佛教。則產中印度與儒教產震旦相等。而歐羅巴未聞產一教主。則瞻部洲內。又以阿細亞冠彼二洲。何疑焉。

墨利加洲當為釋典之西牛貨州。非臆度也。坤輿圖說。

職方外紀言墨利加州之孛露國。金加西臘國。地出金銀。天下稱首。百物皆貴。惟銀至賤。其礦有四坑。役者常三萬人。國王什取其一。七日約得課三萬。而貿易通志言北墨利加洲之麥西可國。有金銀廠。明萬歷至今。銀歲出口者千餘萬圓。歲進口貨價千二百萬圓。南墨利加洲之伯路國。即前之孛露也。金銀山最著。昔為西班牙奪據。歲出銀數百萬至千萬圓不等。近日國人恢復自治。開鑛日旺。又云當明嘉靖時。西洋聞此金山銀嶺之名。于是西班牙葡萄牙國。以兵奪據其地。所獲無算。金條滿

屋。每騎兵各賜二萬圓。步兵各賜萬餘圓。武官各分數萬圓。其後每年所出之數。金七百餘萬圓。銀千有百餘萬圓。有某金廠。自開之後。所出共計萬萬五千萬圓。皆載回西班牙國。鑄造番餅。廣布天下。至今三百年。開鑿無窮無盡。後因西班牙國兵暴虐。宇露人不服。起義驅逐。自立國王。招徠商賈。于是英吉利荷蘭之商。歲運銀回國。約五六百萬圓。銀價漸賤。貨價漸昂。始停止運銀進口。俟他日銀價起時。再運之以平價。然則天下貿易之商。莫盛于歐羅巴。金銀之產。莫盛于墨利加。一為西

方寶主。一為西牛貨洲。何疑焉。今廣東貿易。惟彌利堅國。歲有進口銀四十萬圓。而歐羅巴則專以鴉片耗中國之弊。故彌利堅于我有益無損。英夷于我有損而無益。

問曰。瞻部洲之西方寶主。南方象主。北方馬主。則誠然矣。人則四方所同。何獨以人主歸之東方。曰。請以西夷之書徵之。澳門新聞錄曰。中國人民居天下三分之一。生齒之繁。無國可比。即如俄羅斯地方百四十一萬四千四百方里。戶口不過四千一百九十二萬五千名。而

中國只湖廣一省。廣不過十四萬四百七十方里。已有戶口四千五百零二萬名。江南地方九萬二千九百方里。戶口卽有七千二百萬名。由此觀之。中國只一省。卽抵佛蘭西、英吉利、歐羅巴、特厘阿三國之人民。又華事夷言曰。中國繁庶。甲乎四海。但卽廣東一省之人。可敵他方十餘國。各國皆地廣人稀。卽印度戶口最稠。亦尚有曠土。中國則不惟平地皆田。卽山巔嶺側。無不層層開墾。寸壤不遺。其散布于海外各國者。尚不知凡幾。其繁庶誠四海所未有。由是觀之。則東方之宜人信矣。觀

墨利加洲南北數萬里。明季歐羅巴各國爭往開之。各闢草萊。立城市。竟如自古無人之荒島。近卽回部之西四城膏腴可墾者。動數萬頃。中國有之乎。至北方馬主。不特蒙古。哈薩克、布魯特爲然。卽再北而俄羅斯。其東北際海之地。亦產名馬。以游牧爲生。騎射爲俗。見異域錄及本志。則馬主之說亦信矣。卽其所言衡之。則四主中亦自以人主爲上。

問西洋舟船所至。止有二洲。則釋典此外尚有第三第四洲信乎。曰此外必有二洲。不獨釋典言之也。卽以西

人所製地球觀之。兩洲實止居全地之半。自中國日本
以東。更無大國。其海跨越赤道南北。周八萬餘里。且多
在溫帶。寒暑均平之區。尚勝地球北極下冷帶有人之
地。豈冷帶有人。而溫帶反無人乎。赤道以南。空地亦周
七萬餘里。其地在南極冷帶者半。在溫帶者亦半。溫帶
以下。亦必有國土居民。西人遊迹偶至。名之曰墨瓦蠟
泥加。而不能詳其度數形勢。豈既有其地。而竟無其人
乎。然則東神勝洲。北具盧洲之地。即據地球所餘之空
度。亦鑿鑿當有二洲。又何疑焉。惟釋典所云南北東西

四洲。實不以二極分南北。故自瞻部以外。未可指其孰
為東州。孰為北州。

--	--	--	--	--	--	--	--	--	--	--	--	--	--	--

釋昆侖上

昆侖。卽葱嶺。葱嶺。卽河源之阿耨達池。非弱水條支西

海之地。淮南子十 非金城臨羌之石室。漢書地理志。金城卽臨羌縣。西

北有王母石室。及弱水昆侖山祠。臨羌在今西寧。府。漢志特言望祭於此耳。未嘗言昆侖山在其地。非青

海之大積石。元都 非吐番之閻摩黎山。唐人劉亦非後

藏阿里之岡底斯山也。康熙中。理藩院主事勝住。借刺

蓋前之一說。由誤混昆侖於須彌。次三說。由誤執青海

及吐番河爲河源。最後一說。由誤指阿耨達山在西藏

今不暇言。弱水條支之荒誕。辨詳 與金城積石閻摩黎

之淺近。請先辨岡底斯山。康熙時。回疆未入版圖。奉使刺麻。惟知自侈蕃地。山水遂以後藏阿里之高山當昆侖。當阿耨達。謂天下三條四列之山皆祖。諸此故番語。岡底斯。譯言衆山水之根。又以其山所出支河。譯以馬口。牛口。象口。孔雀口。附會於阿耨達四水。請先徵其不合。一則儒言昆侖。釋言阿耨達。皆居大地之中。今阿里西南徼外之岡底斯山。偏近南海。絕非域中。二則昆侖爲河所源。今岡底斯山距青海重出之河源。五千餘里。距于闐葉爾羌喀什噶爾。初出之河源。亦三千餘里。烏

覩所謂河出昆侖者乎。三則阿耨達池出四大水分歸四大海。今岡底斯山東出者。惟一檳榔江。會大金沙江入緬甸南海。其西出之狼楚麻楚拉楚。三水又皆合赴恒河入南海。并無入東海西海北海之水。况康泰扶南傳恒水出昆侖山。中有五大源。則此後藏入恒河三支。亦非遠源嫡派。四則言阿耨達池在山頂。非山麓。蓋衆山之太祖。必爲衆水之天潢。今岡底斯山前面二湖。在麓非頂。且不通四面支河。安能爲萬水之源。五則西北域記言岡底斯山在烏斯藏西南縣崖峭壁。積高凝冰。

山巔清泉百道。奮湧爭流。自巔至麓。既見又伏。四面如
 獅。如象。如馬。如禽。西北走喀齊。西南走天竺。為各山之
 鼻祖。然廣袤不及二百里。高才五百丈。云云。是其高大
 不及葱嶺十分之一。安能為宇內最高之山。然則昆侖
 果安在。請十徵之。儒籍一徵之。釋典一徵之。西洋圖說
 一徵之。本朝紀載。而知眾山之祖。乃葱嶺。而非岡底斯
 山。所謂河源出阿耨達者。乃葱嶺脊上之木龍池。四語
 謂之哈喇淖爾。果為四大源所出之昆侖也。山海經西
 山經曰。昆侖之邱。實維帝之下都。河水出焉。而南流注

於無達。赤水出焉。而南流注於汜天之水。洋水出焉。而
 西南流注於醜塗之水。黑水出焉。而西流注於大扞。又
 曰。西海之南。流沙之濱。赤水之後。黑水之前。有大山。名
 曰昆侖。之邱。是蓋以洋水西流。為注雷翥海之河。赤水
 南流。為注南海之恒河。黑水當為注北海之阿被河。惟
 河水南流。為注中國之黃河。吳省蘭河源考。以赤水為
 喀什噶爾之烏蘭河。黑水
 為葉爾羌之喀喇河。然經文別出河水于三水之外。不應
 復出河源。而黑水西流。亦乖東注之義。證一
 也。史記大宛傳。張騫使西域。還為天子言于闐之西。水
 皆西流。注西海。其東則東流。注鹽澤。潛行地下。其南則

河源出焉。多玉石。鹽澤去長安可五千里。其後漢使窮河源出于闐。其山多玉石。采來。天子案古圖書名河所出曰昆侖。考張騫僅至于闐。未至葱嶺。故有烏覩昆侖之語。而嶺西水皆西流。則已聞諸于闐之人。是亦明以葱嶺為昆侖。蓋漢時于闐國大。西有葱嶺。曷嘗以于闐南山當昆侖耶。南山脊外之水能入西海耶。水經註引涼土異物志云。葱嶺之水。分流東西。西入大海。東為河源。即禹記所謂昆侖。又言葱嶺在敦煌西八千里。河源潛發其嶺。分為二水。一出岐沙谷。東流徑無雷。依耐蒲

循休圖卷作
休循下同

犁。疏勒。皮山。莎車。各國為河源。一西徑循休。難兜。罽賓。月氏。各國至安息。而注雷肅海。葱嶺有國。名伽舍羅。逝。此國狹小。而總萬國之要道。無不由其城南。是昆侖確為河源。確居地中。分注東西各海。證二也。爾雅河出昆侖。虛色白。所渠并千七百一川。色黃。今星宿海甫出。即燦若黃金。安得色白。安有渠并。安得為昆侖之虛。惟葱嶺河源。銀濤練浪。西域水道記曰。登阿賴山。巔望大龍池。銀濤一片。上涵天光。而其所以并千七百渠者。即回部所受千百支幹之水。皆在未至蒲昌海星宿海以前。是爾雅色白指葱嶺之源。色黃

指星宿海之源。知河源為昆侖。尤必知河所初出之源為真昆侖。證三也。爾雅又言西北之美者有昆侖虛之璆琳琅玕焉。今葱嶺產美玉。見元劉郁西使記環葱嶺之葉爾羌和闐溫都斯坦皆出美玉。詎青海所有。詎岡底斯山所有。證四也。漢書西域傳河有兩源。一出葱嶺。一出于闐于闐在南山下。其河北源與葱嶺河合。東注蒲昌海。一名鹽澤。其水亭居。冬夏不增減。潛行地下。南山積石為中國河。按蒲昌海即今回疆之羅布淖爾。受和闐河及葱嶺南北河。是為二源。葱嶺南河出葉爾羌山中。葱

嶺北河則出喀什噶爾西千餘里之大龍池。是為黃河最遠之正源。故史記引禹本紀言河出昆侖。其高二千五百里。其上有瑤池。瑤池即大黑龍池也。出葱嶺者其正源。出和闐者其旁源。葱嶺河經喀什噶爾。東會葉爾羌河。又東始會于闐河。源流廣大。視和闐河數倍。和闐兩岸沙積。水多湮滲。而葱嶺源數千里。或分或合。不滲於沙。不隔於嶺。自古數河源必於此。則推昆侖者必於此。雖于闐之旁源尚不敢並。況他說乎。證五也。山海經華山七千七百六十七里。曰不周之山東望沕澤。河水

之所潛也。其源渾渾沌沌。

水經註稱鹽澤之水，泗湍電轉為隱淪之脈，即渾沌之謂。

郭註：沕澤，即鹽澤。山形有缺，不周匝處，因名不周。蓋葱

嶺左幹為天山，右幹為南山。包回疆西南北三面，惟缺

東面，形如半規而虛其中。河源蒲昌海出焉，是則葱嶺

即昆侖，即不周之山。故淮南子稱不周之山為天柱，而

七千七百餘里。正葱嶺距華山之里數，證六也。

吳省蘭河源考

曰西域大勢，四隆中窪，而羅布淖爾適當其窪處。凡葱嶺之東，嘉峪關之西，天山之陽，南山之陰，縱橫數千里，

一涓一滴，於是匯歸。惟以東南方一隅為泄水之尾閘，雖流沙間隔千里，而水不流行于沙面，必貫輸于沙底，

雖無顯赴之蹟，可決其潛發之源。魏游雅曰：易言天與水違行，今自葱

此間蓋脫證八

嶺以西，水皆西流，則易之所及，葱嶺以東耳。說文：北土

之高也。從北從一，一地也。人居北南，故從北。中邦之居

在昆侖東南，是則昆侖北為地之主名。故說文以北屬

昆侖。若岡底斯山，則在中國之西南，而中國在其東北。

與說文中邦在昆侖北南，不合矣。證七也。昆侖衆山太

祖。故十洲記云：昆侖有四角大山，為其支輔。岡底斯山

乃其南幹之太宗。但可謂由葱嶺南轉而為岡底斯，豈

反由岡底斯而發葱嶺？何者？山之所趨，水亦從之。如果

山脈自後藏趨北轉西至回部，而為葱嶺，則其水皆應

海國圖志 卷四十一 國地總論 釋昆侖上 十六

從山脈北流。何故後藏之瀾滄江之怒江之龍川江之
大金沙江皆由雲南經緬甸安南以入南海無一北流
之水乎。是知岡底斯山特葱嶺南幹之主峯。而葱嶺北
幹則循塞垣趨朝鮮濊貊與鄂羅斯分界南幹則包烏
斯藏滇粵盡於緬甸暹羅與五印度分界故漢書西域
三十六國惟在葱嶺東者皆屬都護而葱嶺以西無之
我朝聲教所訖亦以葱嶺為斷雖元代初年盡吞
葱嶺以西各國分建藩封卒皆尾大鞭長不受控制豈
獨兵力不逮亦天地大氣之自為界限歟證九也元史

郭寶玉傳太祖征西域入鐵山屯大雪山前谷中雪深
二丈乃禱山川神封昆侖為元極王太鹽池為惠濟王
劉郁西使記逾別石蘭過忽牽河土人言黃河源出南
大山地多產玉疑為昆侖是元人亦明知葱嶺河源為
昆侖證十也更徵釋典言昆侖即阿耨達山者始于康
泰扶南傳及佛圖調傳并見水經註阿耨達亦名無熱止言阿耨達池
出四大水注四大海者見於長阿含經經云雪山頂上有阿耨達池縱廣五十由旬池東有恒伽河從牛口出從五百河入東南海池南有新頭河從師子口出從五百河入西南海池西有博叉河從馬口出從五百河入西北海及唐僧池北有斯佗河從象口出從五百河入東北海

釋昆侖上 十一

元當作
玄下同

元奘西域記。記曰。瞻部洲之中地者。阿那婆答多池也。
 百里。西出縛芻河。入西北海。南出新度河。入西南海。東
 出殍伽河。入東南海。北出徙多河。徙多河潛流地下。出
 積石山。為中國河源。阿那婆答。即阿耨達。而華嚴音義
 之轉音。新頭河。新度河。皆印度河之轉音。而華嚴音義
 述之曰。香山頂上有阿耨達池。四面各流出一河。東面
 斯陀河。出金剛師子口。南面恒伽河。出銀象口。西面信
 度河。出金牛口。北面縛芻河。出琉璃馬口。而阿耨達池
 所在。則西域記徵之曰。自商彌國境東北。踰山七百餘
 里。至波密羅川。川東西千餘里。南北百餘里。狹隘之處。
 不踰十里。據兩雪山間。川中有木龍池。東西三百餘里。

南北五十餘里。據大蔥嶺內。當瞻部洲中。其地最高也。
 其水澄清甘美。池東派一大水。東流東北。至疏勒國西
 界。與徙多河合而東。漢疏勒國。唐之侍沙國。今喀什噶爾也。徙多河已見前。西北
 一大流。與縛芻河合而西。至達摩諦悉國。按徙多河。即斯陀河。縛芻
 河。即博叉河。新頭河。即信度河。一名印度河。即恒河。正
 源也。印度河復中分二流。為東西兩恒河。同注南海。別
 詳印度恒河考。縛芻河。則西流正支。其達摩諦悉國。即
 今葱嶺西之什克南部也。惟入北海之阿被河。雖出葱
 嶺北。幹而不出龍池。故淮南子有黃水三周復所之說。
 蓋重源潛發。猶羅布淖爾之發為星宿海。唐人不知此
 義。故強以縛芻河為北注。而以印度河為西注。辨見恒河考。
 此乃直指葱嶺脊上之
 木龍池。為阿耨達池。即唐元奘取經歸途溺象之地。元奘

還至于闐國上表云今已越葱嶺波密羅川亦即僧

惠生至葱嶺頂盤陀國見脊水西流之地洛陽伽藍記

牛天一本
作半天

步漸高四日至頂約牛天矣漢盤陀國正在山頂葱嶺

即唐書西域傳所指熱海之地唐書葱嶺水南流者經

胡地入于海北三日行度雪海由勃達嶺北行羸千里

得細葉川東曰熱海地寒不凍川長千里自此抵西海

亦即元太祖軍至雪山禱神封祭之地見前元史條下亦即

乾隆中官兵追霍集占未至拔達克山沿岸鏖戰之地

乾隆二十四年四月首霍集占將拔達克山官軍追至
洽喇淖爾遙望五六十里外有塵起越二日追及於和
什克珠庫嶺蓋自池東追至池西也拔達克山近古屬
賓國道有三池盤石阪臨崢嶸不測之深即經此龍池

也北史波知國有三池大者龍王中者龍亦即道光初

官兵追張格爾至阿賴山頂望脊水西流之地阿賴布

牧地在葱嶺者漢盤陀國也追張格爾事見聖武記登阿賴望龍池見西域水道記知阿耨池

則知河源知河源則知昆侖據大地之中當萬國孔道

且滙巨浸千萬仞峯顛分注四大海宇內斷無其匹番

語黑曰哈喇池曰淖爾以水色青黑得名黑龍池之稱

阿耨達與稱哈喇淖爾華梵翻切皆同阿達即哈喇之
轉音耨即淖之

殊非若岡底斯之音義睽隔且西番語謂雪為岡梵語

雪為底斯合番梵皆謂雪山無謂山水根之誼審音辨

註達耨字
蓋當易置

物其將安從。葱嶺亦名雪山亦名香山而西域記則稱在香山之南雪山之北者蓋葱嶺西北出

之幹為香山故釋迦氏譜引閻浮圖有葱嶺西據香山之說其東出二幹一為回疆北路之天山一為和闐之

南山而南北二山皆可稱雪故西域記有葱嶺據兩雪山間之語蓋對文則別散文則通坤輿圖說有高八十

里之理弗依山在葱嶺以西鄂羅斯境內其高次於葱嶺當即香山矣 鄒衍以後異端蠡

起于是十洲記及河圖玉版等書混昆侖於須彌以海

水遶之為弱水環之昆侖既不若是之大後世若唐揚

筠松以須彌為四大幹山之祖則又混須彌於昆侖須

彌又不若是之小。西域聞見錄疑溫都斯坦迤西大澤中高山即繞日之峯尤為陋繆 豈

知釋典起世經言須彌為四洲地之中心昆侖為閻浮

筠松恐倒

提之中心是梵書言須彌者地頂也地心上值天頂正

北極下半年為晝夜之地故言日月繞須彌其外大鹹

海環之於海中有四大洲而昆侖特南瞻部洲中之高

山乃須彌南面之一隅焉得以當全地之須彌哉是釋

典以昆侖為南瞻部洲之中央即阿耨達山與河圖括

地象所稱地中央曰昆侖其東南萬五千里曰神州之

說合與穆天子傳昆侖去宗周澗瀍萬有一千里之數

亦合山海經地東西二萬八千里南北二萬六千里自

積石千七百四十里自積石出隴西郡至洛準地志可

五千餘里。又穆天子傳。天子自昆侖山入于宗周。乃里西土之數。自宗周灑水以西至于河宗之邦。陽紆之山。三千有四百里。自陽紆西至河首四千里。合七千四百里。又昆侖瑤池。去宗周萬一千一百里。此并以葱嶺為昆侖。故里數信而有徵。非同他書五萬里七萬里十萬里四十六萬里之吳說。酈道元顧不信。而信東方朔淮南子等書。幻等蜃市。誕擬蓬壺。豈惟儒書所不合。抑釋典所不屑。道西洋疇人所不屑。譚何者。南懷仁坤輿圖說字內。名山凡九。自西洋高十三里之山起。愈東則愈



未字恐衍

四十六當
作四十七

高。有高二三十里者。有高四十餘里者。有高八十餘里者。其未最高之山。名曰高駕所山。在阿細亞洲境內。高百有三十里。詳見本志總論第四十六卷夫中華在葱嶺之東。則山脈自西來。愈西愈高。高至葱嶺而止。西洋在葱嶺西。則山脈自東往。愈東愈高。亦高自葱嶺而始。山居東西正中。雖譯名不同。而宇內高山。獨推亞細亞洲為歐羅巴洲各山所不及。謂非葱嶺而何以萬山之祖。當萬國之中。謂非昆侖而何。更徵以本朝掌故。乾隆四十七年遣使窮河源歸。詔曰。史記漢書皆言于闐之西水皆

西流注海。其東流注鹽澤。潛行地下。南出為河源。今甲部諸水皆瀦蒲昌海。伏地千里。至青海而始出。正猶濟水之三伏三見。則昆侖當在甲部之西。距此萬里。康熙中錫拉尋河源歸。奏言貴德堡西有三支河。名昆都倫。蒙古謂橫為昆都倫。言有三橫水入於河也。然則甲部所謂昆侖山者。亦當為橫嶺。而不當如元都實牽青海之昆都倫河。為甲部之昆侖山。至矣哉。 聖智周六

合。 聖訓炳萬古。如赫曦之豁蒙。稽自後皇。清通志及松筠西陲總統事略。皆本斯誼。曰黃河近源在星宿

海西三百餘里。遠源則為甲部極西之葱嶺。在喀什噶爾葉爾羌西千餘里。蒙古謂天山水嶺皆名曰昆都倫。急呼則曰昆侖。云云。雖語焉不詳。要之昆侖當為葱嶺。非青海非吐番後藏固已折衷。 大聖誕告中外使

康熙世甲部早同車書。則 聖祖是論固當先。高宗而發之。昔之有天下者。疆域褊狹。多不能有昆侖。能有昆侖。能知昆侖為河源者。皆自我。 大清高宗純皇帝始而拘墟。稽儒猶或泥於康熙朝論定。未有知葱嶺河源之後說者。豈以前說於阿耨達池傳會較詳。

而後說未之及歟。謹勾稽本末具圖及說。繹闡。兩
 聖人先後同揆之義。軒軒並揭天地。又以謂。國家
 撫有西域。主名山川。列正祭隨祭者十有六。不當反遺
 昆侖太祖。非所以母元氣。綱萬靈符古者祭海先河之
 誼。

釋昆侖下

問曰。昆侖之為葱嶺。龍池之為阿耨達信已。顧釋典言
 四水分注四海。而今考元奘西域記。與徐氏西域水道
 記圖。則龍池所出實止三水。東為中國河源。南為恒河。

印度河同源。西為縛芻河源。唐人欲合佛經。四水故以
 印度河當西注。以縛芻河當北注。今子謂印度河即西
 恒河。與東恒河同源。分注南海。無西注之蹟。然則縛芻
 一河將分注西北兩海耶。又佛經言阿耨達四水。皆云
 遶池一匝。從五百河入于大海。後人襲其說。謂河源遶
 昆侖西北及南。而後東流者。官書駁之。謂昆侖大山非
 島嶼。比河安能遶其西北南三面。而復折東以行耶。曰
 是說也。惟淮南子得之。曰昆侖有疏圃之池。河水出其
 東北。阨赤水。出其東南。阨洋水。出其西北。阨黃水。三周

復其源。凡此四水地之神靈。以運萬物。是明言昆侖流出者。惟三水。河水。即黃河。赤水。即恒河。洋水。即縛芻河。其一則伏流潛發。猶水經述蒲昌海。洄湍電轉。為隱淪之脈者。其為阿被河之潛脈無疑。職方外紀及南懷仁圖曰。阿被河源。一出大布里山。即葱嶺北一出基臺湖。即宰桑泊北注冰海。首尾七千二百里。河凍開時。有大冰如山岳。衝擊兩岸。旁溢千二百里。土人遷居入山避之。蓋葱嶺北幹為烏拉嶺。其嶺西北有帕付林高山。時出諸山之上。冬夏積雪。人不能至。即大布里山也。其低平處。

基臺湖

高不過三百丈。而長則自北海至裏海。為阿細亞歐羅巴二洲之界。亦為俄羅斯東北藩屬之界。距阿爾臺山起處不遠。四洲志山巔嶺上。隨處流泉。雖最高處亦甚泥濘。其嶺東出烏拉河。托波爾河。俱東北歸厄爾齊斯河。入北海。異域錄案烏拉嶺。隨地流泉。沮洳泥濘。即潛源重發。同于星宿海之證。故懷仁圖說謂大布里山在俄羅斯境內。案四洲志。稱為烏拉嶺。異域錄稱為佛落克嶺。蓋嶺東出烏拉河。嶺西出佛落克河。故各據所出之河以名之也。嶺西之水。下游會佛爾格河。一作窩爾加其水不北流。而南注入騰吉斯海。土爾扈特游牧其地。稱之曰

厄濟爾河異域錄又賽馬爾罕之納林河亦自東南來會之是則葱嶺以西更無北注之水其北注者惟烏拉嶺東之厄爾齊斯河為北流第一大幹故懷仁圖說列阿被河于阿細亞洲不列于歐羅巴洲也蓋縛芻河出池以後始匯于雷蕭海而後再出潛源阿被河則不出池即伏流地下發于烏拉嶺為潛源觀此而淮南三周復所之義明而佛經阿耨達四水皆遶池一匝之誼亦明矣山海經言昆侖之邱出河水赤水洋水黑水與淮南同惟易黃水為黑水考蒲昌海水青黑重發于星宿川

則黃以此例阿被河蓋淮南預指其重源故黃之山海經惟據龍池之初源故黑之也唐代諸僧求北注之水于葱嶺以西而不得于是強印度河為西流強縛芻河為北注姑無論恒河誣謬與佛經不合試問縛芻河之水果何歸宿耶夫縛芻河為龍池西出之正流即水經注所謂有為水潛發葱嶺西逕循休難兜罽賓國北月氏安息國南與蜺羅蚊禘水同注雷蕭海者也即元史之阿母河亦作暗布河亦作阿梅河元設行中書省以控制西域者也亦即南懷仁坤輿圖入裏海之阿書河

二圖字當
作國米國
下脫安字

其上游曰亞被亞河。曰亞母湖者也。阿母阿書即其水縛芻之音轉

右並葉河。葉河出葱嶺北原。西北流逕石國。康國。米國。圖何圖史國等地。見大唐西域記一作素葉川即今納林河。逕教罕西。哈薩克入裏海者。左受烏澹河。逕吐賀羅。月支國。見後

漢書新唐書一作馬澹河即水經註之蜺羅蚊禘水。出阿耨達山之北。西逕亂尸羅國。四大塔捷陀衛國。至安息。注雷翥海者。雷翥海即裏海。一名鹹海一名北高海一名加士比

名達里阿泊凡葱嶺東之水。皆瀦蒲昌海。即羅布泊爾葱嶺以西之水。皆瀦裏海。蒲昌海之水。伏流潛發于星宿海。為黃

河。以入東溟。則裏海之浩蕩淵溟。斷無永瀦而不發之理。故嘗謂裏海以東之大乃河。長二千四百里。分三道。入墨阿的湖。以達地中海者。當為裏海潛源重出之河。是縛芻河為西注。正幹而唐僧之強。印度河為西注。又強。縛芻河為北注。者萬不可通矣。蓋葱嶺北幹曰烏拉嶺。橫抵北海。故葱嶺以西之水。為烏拉嶺所包。皆不北注。而西南入裏海。其北注者。惟葱嶺東北之阿被河。潛源重發。一發于烏拉嶺。一發于宰桑泊。皆匯歸厄爾齊斯河。即阿被河也。一作阿比後人縱或知阿被河。即厄爾齊

斯河。又以其不顯出阿耨達池而疑之。又或不知厄爾
 齊斯河有兩源。但知其出宰桑泊。即基臺湖。而不知其
 出烏拉嶺者。即太布里山。即葱嶺北幹。又或泥南懷仁
 圖繪賽馬爾罕于基臺湖之上。則益疑之。此西圖之大
 罕。在葱嶺西。其下。游
 豈有注北海之水乎夫古者九能之士。山川能說。其非
 徒說形勢分合之謂。其必察地理脈水性。并其卓詭之
 狀。隱潛之絡。而瞭知之。昆侖阿耨達之三周。遶匝。使不
 一證諸淮南子。再證諸水經註之蒲昌海。三證諸烏拉
 嶺之隨處流泉。沮洳泥濘。其不供下士大笑者。幾希。濟

水絕河而南。三伏三見。使不出中國。而傳自外夷。其不
 斥為誕罔者。幾希。或曰。黃水三。周復其源。此語非淮南
 所能創。果何據。依曰。穆天子傳。天子
 升于昆侖。觀黃帝之宮。釋氏西域記。阿耨大山。其上
 大淵水。宮殿樓觀甚大。焉是昆侖。有黃帝遺蹟。自非乘
 龍御天之大聖。孰能智周六合。若此者乎。又西域記。葱
 嶺南接雪山。北至熱池。千泉。千泉者。地方二百餘里。南
 面雪山。三垂平陸。即今伊犁河所西。滙之巴勒喀什泊
 也。葱嶺得名。以西域記。山嶺葱翠之說。為正。顏師古謂
 產野葱。陋不足辨。至南懷仁等。皆謂裏海之水。浩蕩甚
 鹹。不通外海。獨海國聞見錄。言裏海之水。流出。包禰不
 知何據。豈誤以印度河出自裏海乎。置之不論可矣。

